



## AKCIJA LAVINA

Istraga u vezi s kriminalom u 'Bobar banci'

# Uhapšene Injac i Vujnić, šteta 123 miliona KM!

Pripadnici **SIPA-e** u Banjoj Luci i Bijeljini priveli odgovorne osobe koje se sumnjiče za nezakonite radnje u „Bobar banci“

Pripadnici Agencije za istrage i zaštitu (SIPA) uhapsili su jučer u Banjoj Luci direktoricu Agencije za bankarstvo RS Slavicu Injac i direktoricu Investiciono-razvojne banke (IRB) RS Snežanu Vujnić. One su uhapšene po nalogu Tužilaštva BiH u akciji „Lavina“.

### Sumnjivi krediti

Iz Tužilaštva BiH saopćili su da je akcija rezultat višemjesečne istrage o krivičnim djelima i nezakonitostima vezanim uz „Bobar banku“. Osim Injac i Vujnić uhapšeni su i radnici „Bobar banke“ Petar Cacanović, Radmila Đurišić, Sonja Kurtuma, Ana Mirosavljević, Batrić Đurišić i Zdravko Dubov. Oni se sumnjiče za zloupotrebu položaja ili ovlaštenja, zloupotrebu ovlaštenja u privredi, pranje novca, falsificiranje ili uništavanje službenih isprava. Pripadnici SIPA-e pretresli su tri kuće na području

Banje Luke i Bijeljine.

Navedene osobe sumnjiče se da su kao grupa pripadnika međusobno povezanog i

organiziranog zločinačkog udruženja počinili nekoliko nezakonitosti u poslovanju „Bobar banke“. Nezakonitosti se odnose na dodjele kredita u višemilionskim iznosima, kao i nezakonitih bankarskih garancija za razne poslove, uz kršenja procedura i garancija propisanih Zakonom o bankama RS. Na taj način ove osobe su načinile štetu koja se procjenjuje na 123 miliona maraka.

Uhapšeni su davali kredite i bankarske garancije bez poštovanja zakonom propisanih procedura. Krediti su odobravani preduzećima i privrednim subjektima različitih vlasnika koji su pove-

zani ili su vlasnici „Bobar banke“. Injac i Vujnić znale su da se naplata kredita neće moći izvršiti i da su korištene nezakonite garancije.

Ovakav odnos prouzrokovao je stečaj „Bobar banke“ i ozbiljne potrese u bankarskom sektoru RS.

Iz Tužilaštva BiH poručili su da su ove nezakonite aktiv-


nosti nanijele veliku štetu kreditnom rejtingu BiH i dovele do toga da se Međunarodni monetarni fond aktivno uključi u analizu dešavanja u bankarskom sektoru.

Ovakvim aktivnostima ugroženi su i depoziti različitih pravnih i fizičkih osoba koji su bili deponovani u „Bobar banci“. U to su uključena i sredstva mnogobrojnih gradova, opština, preduzeća, zdravstvenih zavoda, PIO fondova, kompanija iz energetskog sektora. Nanesena je i višemilionska šteta Agenciji za osiguranje depozita BiH - saopćili su iz Tužilaštva BiH.

### Ustanove šutjele

Agencija za bankarstvo RS, prema mišljenju brojnih stručnjaka i analitičara, omogućila je propast „Balkan investment banke“ (BIB), „Bobar banke“ i „Banke Srpske“. Izvještaj Deviznog inspektora RS o kontroli provedenoj u BIB-u nedvosmisleno je dokazao da je za pljačku u ovoj banci najodgovornija Agencija za bankarstvo RS, odnosno Slavica Injac. Inspektori koji su radili ovu kontrolu zaključili su da se nijedna kriminalna radnja u BIB-u nije mogla desiti bez znanja Agencije za bankarstvo RS.

**G. DAKIĆ**



Bijeljina: Pripadnici SIPA-e proveli detaljnu istragu (Foto: G. Bobić)



Banja Luka: Injac odvoze iz Agencije za bankarstvo RS

## Čavić: Pljačka se godinama

Predsjednik NDP-a Dragan Čavić kazao je da je ovo hapšenje očekivan epilog i naglašava da je više nego neophodno da Tužilaštvo BiH izade s

čvrstim dokazima.

- Neko mora odgovarati za višegodišnju pljačku. Evidentirana je šteta veća od sto miliona maraka - rekao je Čavić za "Avaz".

## Dodik: Manifestacija sile

Predsjednik RS Milorad Dodik rekao je da hapšenje Injac i Vujnić predstavlja manifestaciju sile i da pokazuje "političku obojenost" Agencije za istrage i zaštitu i Tužilaštva BiH. On je istakao da je SIPA "nastavila da paradira po RS pogotovo

nakon što su je preuzeli kadrovi SDS-a".

- SIPA i Tužilaštvo BiH su nevažeće ustanove. Upadanje SIPA-e u institucije RS je manifestacija grubosti i dokaz da nam ovakva BiH uopšte ne treba - kazao je Dodik.



Injac i Vujnić: Čelnice Agencije za bankarstvo RS i IRB-a